

Script of Morning Gojri News Bulletin 12 October 2025 at 1015Hrs

مارننگ گو جری نیوز بلیٹن مورخہ 12 اکتوبر 2025

یوہ آکا شوانی جموں ہے محمد امین انجم تیں خبر سنو۔

CM Half Marathon

وزیر اعلیٰ عمر عبداللہ نے اج سویرے دہلی غی گلیاں مانہ ہزاراں حصے داراں غے
بمراہ دہلی ہالف میراتھن دوڑ مانہ حصو لیو۔ اس دوڑ نانہ جواہر لعل نہرو اسٹیڈیم تیں
جھنڈی دس غے روانہ کیو گیو۔ 2.6 لکھ امریکی ڈالر غا انعام آلی اس دوڑ مانہ دنیا پھر
تیں مشہور کھلاڑیاں نے حصو لیو۔

Dy CM Statehood

نائب وزیر اعلیٰ سریندر چودھری نے باریں امید ظاہر کی ہے جے سپریم کورٹ جموں
کشمیر واسطے ریاست غو درجو بحال رکھنو یقینی بنا غے انصاف برقرار رکھے گی۔
بھگوتی نگر جموں مانہ اخباری نمائنداں نال گل کرتاں واں انہاں نے کہیو جے لوک
عدالت عظمیٰ ور امید غی آخری کرن غے طور بھروسو کریں۔ انہاں نے عدالت نانہ
اپیل کی ہے جے واہ لوکاں غا دل غی دھڑکن سنے نہ کہ سیاست دانان غا دل غی
دھڑکن۔

Rana Forest

جنگلات تے ماحولیات غا وزیر جاوید احمد رانا نے جموں کشمیر پھر مانہ شجر کاری
کوشش مضبوط کرن ور زور پایو۔ اک جائزہ میٹنگ غی صدارت کرتاں واں انہاں نے
موسمیاتی للکاراں غو سامنو کرن غی خاطر تفصیلی شجر کاری، شجر کاری تیں بعد
غی دیکھ بھال اور لوکاں غی شمولیت غی گل کی۔ جناب رانا نے ترقیاتی پروجیکٹاں
واسطے جنگلاتی رکاوت دور کرن غی خاطر باقاعدگی، ماحولیاتی حفاظت سنگ سمجھوتو
کیاں بغیر بنان ور زور پایو۔ انہاں نے مٹی تحفظ ماحول دوست سیاحت نانہ باندو دین اور
جنگلات بارے قانون موثر طریقہ نال عملان نانہ وی اُجاگر کیو۔

CS Handicrafts

چیف سیکریٹری اتل ٹلو نے کل جموں کشمیر مانہ دستکاری اور ہتھ کر گھا سیکٹراں
غا ترقی باندہ واسطے اک اعلیٰ سطحی جائزہ میٹنگ غی صدارت کی۔ اس موقع ور
انہاں نے جی آئی ٹیگ شدہ مصنوعات غو پتو لان غی صلاحیت، ایکتا ملاں جیسا تیز
کلیدی پروجیکٹاں اور کاریگر حمایت اسکیمان نانہ مضبوط کرن ور زور پایو۔ اس موقع
ور عہدیداراں نے اس سلسلہ غی اہم پیش رفت اُجاگر کی۔

E Vehicles

حُکام نے جموں مانہہ با ریں برقیاتی گڈیاں نانہہ با قاعدہ بنان غا سلسلہ مانہہ اک حکمنامو جاری کیو ہے۔ حکم نامہ غے مطابق برقیاتی گڈیاں بُن ضلع غے اندر مقرر کیا گیا علاقان غے اندر ہی چلیں گی۔ اس کا روانی غو مقصد ٹریفک نانہہ درست کرنو اور سڑک حفاظت یقینی بنانو ہے۔ جموں ضلع غا ڈپٹی کمشنر راکیش منہاس نے یوہ حکم نامو ضلع سڑک ٹریفک حُکام ڈی آر ٹی اے غی ایکن میٹنگ غی صدارت کرن تیں بعد جاری کیو ہے۔ جناب منہاس نے اعلان کیو ہے جے اس ضمن غا نواں انتظام 23 اکتوبر تیں شروعاتی 3 مہیناں واسطے لاگو ویں گا۔

Poshan Mah

خواتین اور بچاں بارے محکمہ غی طرفوں چل رہیا پو شن ماہ غا سلسلہ مانہہ کھنڈ اور تیل غو استعمال کھٹ کرن موٹاپا غو مقابلو کرنو اک کلیدی موضوع ہے۔ اس ضمن مانہہ ضلع رام بن غا بکھ بکھ آنگن واڑی مرکزیاں مانہہ اک صحت مند معاشرہ بنان غی خاطر کھنڈ اور تیل غو استعمال کھٹ کرن بارے بیداری پیدا کرن واسطے کیمپ لایا جا رہیا ہیں۔ یہ کیمپ خواتین اور بچاں غی صحت درست رکھن غی خاطر لازمی خدمات مہیا کراویں گا۔

Kathua GST

ایڈیشنل ڈپٹی کمشنر کٹھوعہ نے جی ایس ٹی ریٹ کھٹ کرن غی موثر عمل آوری یقینی بنان واسطے مقامی تاجراں سنگ ایکن میٹنگ غی صدارت کی۔ میٹنگ غی توجہ غو مرکز نواں ٹیکس نرکھاں بارے تاجراں مانہہ بیداری پیدا کرنو اور صارفین نانہہ فائدہ دین غی خاطر نواں ٹیکس نرکھاں غی سخت عمل آوری غی اپیل کرنو تھو۔ اے ڈی ڈی سی موصوف نے شہریاں تے تاجراں تیں مالی بوجھ نرم کرن اور کسے وی قسم غی بد عملی نانہہ روکن واسطے سرکار غا عزم ور زور پایو۔ میٹنگ مانہہ با قاعدہ نگرانی اور ٹیکس عہدیداراں نال تال میل ور وی تبادلہ خیال کیو گیو، تانجے کٹھوعہ ضلع پھر مانہہ جی ایس ٹی غا کھٹ نرکھاں غو ہموار نفاذ یقینی بنایو جا سکے۔

Police Diwali Mela

جموں کشمیر پولیس 14 اکتوبر بوقت 10 بجے سویر تیں گلشن گرائونڈ جموں مانہہ دیوالی میلہ 2025 غی میزبانی کرن واسطے تیار ہے۔ یوہ میلو لوکاں نانہہ داعوت دئے جے ویں مزا اتحاد یادگار تے ڈیوٹی غے دوران اپنی جان دین آلا بہادراں غی عزت مانہہ اکھٹا ویں۔ سوشل میڈیا ور ایکن پیغام مانہہ آئی جی پی جموں نے شہریاں نانہہ اپیل کی ہے جے ویں اُن بہادراں نانہہ وی خراج عقیدت پیش کریں جنہاں نے عظیم قربانی دے غے مہاری زندگیاں روشن کیں۔

NHM

زمینی سطح ور صحت دیکھ بھال مضبوط کرن آلے پاسے اک قدم مانہہ مشن ڈائریکٹر این ایچ ایم جموں کشمیر بصیر الحق غی صدارت مانہہ مالی سال 27/2026 بارے ضلع صحت عملی منصوبہ ضلع جموں غو جائزو لیو گیو۔ میٹنگ غی توجہ غو مرکز کلیدی صحت شروعاتان غی موثر عمل آوری یقینی بنانو تھو۔

اس غے نال ہی خبراں غو یوہ بلیٹن ختم ہوؤ۔